

地 130.207
539
5073

五十五



雄縣鄉土志

雄縣鄉土志叙

鄉土志者爲鄉土歷史與地格致各種科學之濫觴實卽邑乘之別派未有邑乘闕如而鄉土志可臻詳核者也況人類氏族宗教實業商務各門尤爲向者邑乘之所略必欲一一盡求其詳實完美此尤非咄嗟可以取辦者矣攷雄縣志託始於明嘉靖間教諭王公齊再修於康熙九年知縣姚公文燮三修於康熙十六年知縣來公淑洙四修於康熙三十年邑人馬之驥王志今久佚姚志僅存亦磨滅不可卒讀來志馬志均未付梓迄今來志無存馬志亦闕其二卷二百餘年久失修輯老成凋謝文獻無徵欲強起而續之豈不難哉是以近年來私心竊計嘗欲博採旁搜補苴完繕然每因難而輟迄未成書今歲夏六月直隸學務處檄各府州縣修鄉土志並頒例目徵博學能文之士按目攷查依例采錄限年成書以爲各小學堂教科書之原料邑侯蔡穆如先生因以斯役見委伏思繼往開來吾黨之責當仁不讓古有名言迹雖鄰於僭妄然不可謂非吾人應盡之義務也受任以來頗形竭蹶每日自學堂課程六時外以

餘時修志其見於通志府志姚志馬志者輒手錄之其不載者則進闔邑父老子弟而咨詢之時而摩挲乎殘碑斷碣時而歷覽乎族乘宗祠長吉錦囊隨時傾倒梁公藥籠並蓄兼收凡六閱月而十五例目始克粗具模型噫以藐焉中處之身勉竭數月之心思才力而欲貫穿二百年之時代牢籠一邑之事實凡闕沒而弗彰者俾一一發揮而光大之此亦不量其力之不勝而忘其不精不詳之謂矣雖然畏其難而有待焉將後有作者安知不益病其難而並病我今日之畏難苟安而忍而與之終古耶故夫今志之作非作也正留以待於後之作者起而補其闕拾其遺終有以成其志也是非徒私心之所厚望實吾鄉少年所共奉以爲多識蓄之資且因愛鄉土而養成愛國心者吾安得且暮而遇之哉時光緒三十一年十二月初十日劉崇本撰

鑒定者 花翎五品銜署雄縣知縣浙江蔡濟清

編輯者 雄縣高等小學堂教員學部主事劉崇本

採訪者 高等小學堂董事增生郭乃文

膳錄者 高等小學堂司事童生王俊清

採訪兼膳錄者高等小學堂肄業生

採訪兼繪圖者高等小學堂肄業生楊玉琳

韓樹榮 董紀雲 陳樹棟 呂勤 張佩卿 楊漢文 田寶硯 李萬選 楊蔭清 張篤純 王一炳 劉一枝

時得霖 劉崇經 張鳳羣 鄧鍾祥 胡連棠 楊述文 李豫樟 孟啟沅 孟啟沅 張國楹 蘇維謬 王炳圖

劉書芳 王國楨 仇注山 仇金洛 張景宗 劉耀宗 董振英 文玉璋 馬春元 高景元 仇儒坊 劉儒坊

雄縣鄉土志歷史第一

雄縣明太祖洪武七年置。隸保定府。周以前或屬冀州。或屬幽并。時縣境固無本名字也。姑名之曰州屬時代。自周封召公於燕。後徙都易。而易實卽雄縣最古之名。自後公孫瓚稱易京。晉改易城縣。至北魏仍復故名曰易縣。是可統名爲易縣時代。自高齊省易入莫。以迄於隋。而易之名遂終廢。是可名之曰入莫時代。唐置歸義縣。經五代而入契丹。皆仍之。是曰歸義時代。後周世宗置雄州。而雄之名始著。厥後或賜名郡。或置軍節度。歷宋與元。而新城容城且時隸焉。此時代間。雄之版圖最廣。是曰雄州時代。自明降州爲縣。而雄縣之名遂沿至於今。此則可統稱爲既置雄縣以後之時代也。茲斷代爲章。凡六。揭之如左。

州屬時代

唐堯八十載。禹治水功成。作禹貢。定九州。曰冀、兗、青、徐、荆、揚、豫、梁、雍。縣境屬冀州。蓋古者中國之地。但分九州。禹亦因其舊耳。

虞舜攝位之十載。肇十有二州。曰冀、兗、青、徐、荆、揚、豫、梁、雍、幽、并、營。始分冀東恒山之地爲并州。縣境屬之。北道刊誤志謂屬幽州。以未詳考其疆界位置耳。夏併九州。縣境仍屬冀州。

商代縣境屬幽州。考爾雅釋地。云燕曰幽州。注自易水至北狄。是幽州南界易水也。而雄古稱易易。是在易水北也。孫炎以爾雅之文。與禹貢職方並皆不同。疑是殷制。或可信也。

周夏官職方氏掌天下之圖。以掌天下之地。又曰乃辨九州之國。正北曰并州。其川滹池。嘑夷。其浸溱易。考滹池卽滹沱河。嘑夷卽唐河。溱有二源。卽巨馬河。易有三源。皆出易州。滹沱河舊巡縣境之茅兒灣。合以上諸水由天津入海。則縣境之屬并州無疑。其曰正北者。以在冀州之北也。

易縣時代

周武王克商之年。封召公奭於北燕。後徙都易。易卽雄縣最初肇錫之名。秦始皇帝并六國。分天下爲三十六郡。以易縣屬上谷郡。



漢高帝十二年。改上谷郡爲燕國。分置涿郡。以易縣改屬涿。

文帝元年。以易縣改屬河間國。東漢仍之。

東漢獻帝興平二年。公孫瓚築城據之。號易京城。

晉改易縣爲易城縣。屬涿郡。東晉仍之。

後魏道武帝天興二年。後燕李朗以涿郡屬魏。魏復故名曰易縣。改屬高陽郡。

入莫時代

北齊天保七年。省易縣入莫縣。易縣之名自此遂廢。

隋文帝開皇元年。改郡爲州。莫縣仍屬涿州。

煬帝大業二年。改州爲郡。以莫縣屬河間郡。

歸義時代

唐高祖武德五年。改置歸義縣。屬幽州。尋置北義州於容城。以縣屬焉。太宗貞觀元年。省入河北道。八年。復置歸義縣。屬幽州。

大歷四年。歸義縣改屬涿州。

四

後晉天福元年。石敬瑭割燕雲十六州賂契丹。歸義沒入遼。屬涿州。

雄州時代

周世宗顯德六年。自將伐遼。取瓦橋關。置雄州。而雄之名自此始。並割容城來屬。尋復別屬。

宋太宗太平興國六年。以雄州新鎮。復置平戎軍。改歸義曰歸信縣。並以容城來屬。


徽宗政和三年。雄州賜名易易郡。於歸信置廣信軍。屬河北東路。金天會七年。置永定軍於雄州。屬河北東路。貞元二年。改屬中都路。

元世祖至元元年。雄州及永定軍俱廢。二十一年。復置雄州。屬大都路總管府。治歸信縣。並以新城容城來屬。二十三年。以雄州隸保定路。此雄屬保定之始。

既置雄縣以後之時代

明太祖洪武元年。省歸信縣入雄州。七年。改州爲縣。屬保定府。而新城以六年。容城以十四年。亦先後改屬保定府。

國朝順治元年。定鼎北京。悉如明制。



雄縣鄉土志政績錄第二

凡官本境有惠政者均記之。其非官本境而有德於本境者。如宋張希一。王漢之等。間錄一二。以明受賜到今之義。至如明楊松陳復初等。雖不官本境。而死事於本境。亦節錄之。以彰忠藎。例目約分三大端。曰興利。曰去害。曰聽訟。茲不分類。特依年代先後。編次如左。

五代

王晏球。後唐賜名李紹虔。同光四年。與段凝房知溫守瓦橋。有機略。善撫御士卒。後爲招討使。大敗契丹兵。橫刀棄甲。六十餘里。中國之威大振。自晏球始。餘見新五代史。

宋

侯仁矩。平遙人。宋初爲雄州刺史。治軍多方略。歷仕數郡。咸有善政。曹翰。大名。太平興國五年。詔督役開南河。自雄達鄭。以通漕運。議築隄以捍之。

張昭允。字仲孚。衛州人。端拱初爲雄州監軍。敵騎乘秋掠境上。昭允與知州田仁朗。選銳卒襲其帳。敗走之。

劉福下。邳人。端拱二年。爲雄州防禦使。兼本州兵馬部署。雄州地控邊塞。常屯重兵。福至。部按行軍壘。調鎮兵以給繕完。出私錢以共晏犒。領雄州五年。郡境安謐。

安守忠。元豐間知雄州。嘗與僚佐宴飲。有軍校謀變。闖者入告。守忠言笑自若。謂客曰。此輩酒狂耳。矜之可也。人服其量。守忠謹慤淡泊。爲治簡靜。所至藩郡。樂施予。豐宴犒。且喜與士大夫遊。故時論多與之。

何承矩。河南人。爲制置河北緣邊屯田使。自順安高陽以東。資其波澤。築隄貯

水爲屯田。且遏敵騎。期歲間。關南諸泊悉壅闔。瀕海廣袤數百里。盡爲稻田。而有莞蒲。蜃蛤之饒。民賴其利。醇化五年。知雄州。推誠御衆。同其甘苦。邊民有告機事者。屏左右與之款接。故契丹動息。皆能前知。契丹夜襲城下。承矩出駁。擊走之。眞宗時復拜雄州團練使。自守邊以來。意在朝廷。懷柔遠人。爲息兵之計。

收地利以實邊。設險固以防塞。春夏課農。秋冬講武。休息民力。以助國經。故任邊稱有功焉。餘見宋史本傳。

李允則字垂範。并州孟人。真宗時知雄州。河北既罷兵。允則治城壘不輟。契丹疑違約。既而有詔詰之。允則奏云。初通好不卽完治。恐他日頽圯。因此廢守。邊患不可測也。帝以爲然。始州多以草覆屋。允則取材木山西。大爲倉廩營舍。始教民陶瓦甃。標里閉。歲修禋事。召戰棹爲競渡。潛寓水戰。州北多設陷馬坑。城上起樓爲斥候。允則以南北既和。因命徹樓夷坑。爲諸軍蔬圃。浚井疏池。列畦隴。築短垣。縱橫其中。然其地益阻隘。復命境內有隙地。悉種榆。久之榆滿塞下。借阻敵騎。上元然燈結綵。山聚優樂。使夜縱遊。明日偵北酋欲間入城中。覲伺之郊外。果有紫衣人。至遂與俱入傳舍。不交一言。出奴女羅侍左右。劇飲而罷。且置其所乘騾廐下。使遁去。卽幽州統軍也。後數日爲契丹所誅。嘗宴軍中。而甲仗庫火。允則作樂行酒不輟。請救不答。帝使詰之。對曰。兵械所藏。燬火甚嚴。方宴而焚。必姦人所爲。舍宴而救。事或不測。一日民有訴爲契丹民毆傷而遁。

者。允則不治。衆以爲怯。逾日幽州以其事來詰。答以無有。蓋他謀欲以歐人爲質驗。比得報以爲妄。乃殺諜。允則不事威嚴。或間出與民坐語。以是洞知人情。訟至面訊立斷。盜發輒獲。餘見宋史本傳。

劉承宗善射。兼習書數。真宗大中祥符中。知雄州。河北緣邊安撫使。在郡有治績。詔書嘉獎。

王能定陶人。咸平初知靜戎軍。建議決鮑河。斷長城口。北注雄州塘水。爲戎馬限。方舟通漕。以實塞下。景德中爲鎮定高陽三路都部署。押策先鋒。護城雄州。躬率丁夫。且暮不離役所。宴犒周洽。

王德用趙州人。天聖初知廣信軍。州即雄城壞久不治。德用率禁軍增築之。有詔褒諭。

張昭遠知雄州。會大雨。陂塘溢。昭遠勅兵築長隄。以捍其衝。

趙滋字子深。開封人。仁宗時知雄州。會契丹民數違約。乘小舟漁界河中。吏憚生事。累歲不能禁。後又遣大舟十餘。自海口運鹽入界河。朝廷患之。滋戒巡兵。

舟至輒捕其人殺之。輦其舟移文還涿州。漁者遂絕。在雄六年。契丹憚之。契丹嘗大饑。舊米出塞。不得過三斗。滋曰彼亦吾民也。令出米無所禁。邊人德之。葛懷敏仁宗時知雄州。恩信孚洽。賊不敢犯。會大旱塘水涸。懷敏慮契丹使至。測其廣深。乃壅界河水注之。塘復如故。改滄州。士民遮留數日乃得去。

劉兼濟字寶臣。祥符人。仁宗時知雄州。先是邊民避罪逃者。契丹輒納之。守將畏事不敢詰。兼濟悉移檄責還。

李緯楚邱人。仁宗時知雄州。治兵頗嚴。不事廚傳。節公使錢。貯米三千斛。爲常平積。奏下其法他州。

張希一字簡翁。開封人。仁宗時累使遼。遼人以雄州不當禁漁界河爲言。希一日界河之禁。起於大國統和年。今文移尙存。遼人詞塞。

張利一字和叔。希一弟。知雄州。遼人刺兩輪民爲兵。民不堪其辱。利一綏來之。有大姓舉族南徙。慕而來者至二萬。利一發倉廩賑恤。且移牒涿州。自是不敢復刺。

高繼勳字紹先。亳州蒙城人。仁宗時知雄州。契丹獵燕薊。候卒報有兵入鈔。邊州皆警。繼勳曰契丹賴漢命。豈敢損盟好耶。居自若。已乃知渤海人叛契丹。行剽兩界也。

王臨字太觀。大名成安人。雄州判官。卽沿邊安撫都監。契丹刺兩輪人爲義軍。來歸者數萬。或請遣還。臨曰彼歸我而遣之。必爲亂。不如因而撫之。自是來者益多。契丹悔失計。後知廣信軍。餘見宋史本傳。

劉舜卿字希元。開封人。神宗時知雄州。契丹繫州民獄。索之不聽。會有使者至。因捕取其一以相當。必得釋乃遣。契丹兵竊關鎖。吏密以聞。舜卿但易其門鑰。大之。後數日契丹牒送盜併鎖至。舜卿曰吾未嘗亡鎖。命加於門。不合併盜還之。敵大慚。治盜罪。在雄六年。恩信周洽。

李格非濟南人。紹聖中通判廣信軍。有士人說禍福。出必乘車。格非遇之。叱左右收之。窮治其奸。杖而出諸境。

楊應詢字仲謀。徽宗時爲河北緣邊安撫使。帝以歸信容城兩縣弓手爲契丹

所憚。欲增爲千人。或恐生事。應詢曰。吾欲備他盜。彼安能禁我。卒增之。知雄州。朝廷多取西夏地。契丹以姻婭爲言。遣吏乞還不得。擁兵犯塞。中外恟疑。應詢曰。是特爲虛聲嚇我耳。願治兵積粟。云有備。彼將聞風自戢。明年果還兵。郭成知雄州。以功遷防禦使。疎財好施。襟度豁如。

曹偕字光道。知雄州。議者欲廢塘灤爲田。偕曰。何承矩李允則營此。所以累年限契丹。廢之不可。

王漢之。徽宗時知瀛州。上言。自何承矩規塘灤之地屯田。東達於海。其後又修保塞五州爲隄道。備種所宜木三百萬本。此中國萬世之利也。今寢失其道。願講行之。雄州歸信容城災。兩輸戶請蠲稅。不聽。漢之言。雄州規小利失大體。萬一契丹蠲之。爲朝廷羞。

金

馬諷字良弼。大灤陰人。歸信令。境有河曰八尺口。每秋潦漲溢。害良田。諷視地高下。疏決之。其患遂息。召爲尙書省令史。金史有傳。

四

完顏宗賢。太宗監國。爲永定軍駐今雄縣節度使。天德初召入。雄州父老相率張青繩。懸明鏡於公署。老幼填門。三日乃得去。

元

王時可至正間知歸信縣。兼管諸軍。與勸農事。作均樂亭記。

明

楊松洪武初爲總師都督。率兵八千。戍雄縣。後爲燕前鋒張玉副千戶。朱能襲破其東門。敗走易陽橋。被執不屈而死。

潘忠以督都副楊松戍雄縣。兵敗死之。

陳復初建文朝靖難兵起。以禮部侍郎監軍雄縣。李景隆敗績於白溝河。復初具朝服。南向再拜。躍馬入於河。死之。

瞿能建文時爲領軍督都。與陳復初同事。而戰功最烈。兵敗死之。事見通紀。以上

四人祀西門內忠孝節義祠。舊志云。二八月上戊日。由縣官致祭。今祀。

程九鼎括蒼人。洪武初知雄縣。時初脫兵燹。榛莽弗治。九鼎竭力草創。百務修

舉。又具人倫鑒。如識劉觀於諸生。後卒爲名臣。祀名宦。

常毅。黎陽人。宣德間。知雄縣。廉察恭慎。勤恤民隱。嘗修學校。新祭器。

秦紘。單縣進士。授御史。天順間。以言事謫雄縣。勤明廉慎。政教並舉。境內肅然。

公庭晝靜。暇日召集諸生。親爲講解。後忤中官。被逮於京。雄之旄倪數千人。伏闕請貸。詔宥之。祀名宦。

蕭琮。大同舉人。成化初。任雄縣教諭。心地光明。勤於啟迪。士子咸頌之。

劉傑。泌水人。成化時。知雄縣。剛方勇略。不畏強禦。

王夢賢。字良弼。夏津舉人。宏治間。知雄縣。廉勤公正。才思敏達。政治有方。修舉廢墜。百務皆興。祀名宦。

劉英。掖縣進士。宏治間。知雄縣。剛直明敏。慷慨敢言。禮士愛民。令行禁止。民亦稱便。陞知州。

陳言。長樂進士。德量淵宏。制行謹厚。工書能文。至剔蠹弊。毀淫祠。尤力焉。未久以外艱去。後陞監察御史。

五

杜翊。維縣舉人。沈靜簡默。勤恤民隱。人咸愛慕之。尋以憂去。

馬紀。字直卿。鈞州進士。廉能勤慎。明敏公平。賑恤流亡。醫濟瘟疫。省約浮費。芟刈豪強。各得其當。而作新學校。勸課生徒。尤爲加意。故士慕民懷。而旁邑之訟

獄者。日爭趨焉。陞監察御史。祀名宦。

王繼祿。字天錫。洛陽舉人。宏治間。任雄教諭。學問淵雅。博識宏通。時雄久乏科第。繼祿銳志立教。無間寒暑。日督課程。未幾蘇袁宗趙吳世光聯翩以去。一時服其造就。祀名宦。

何勛。陳州貢士。任雄縣教諭。學政修明。志行高潔。而啟迪有方。才識亦稱。士子賢之。

魏綸。字理之。利津舉人。少年博學。雅量俊才。工於詩文。署雄縣教諭。條教嚴明。勤於訓課。自繼祿之後。而文風再振。時流寇竄發。綸上十事。多見施行。陞戶部主事。祀名宦。

捏經。河南舉人。任雄縣教諭。正直爽慨。以身立教。士儒成服。以上正德

易鴻字仲霄。固始舉人。嘉靖初任雄縣令。持身臨事。不循不阿。興學校。恤寒士。事集而不擾。惠洽而不費。秋水侵縣南路。建橋築隄。塗者稱快。民間有不孝婦。立誅於市。奸宄慄然。士民無不悅服。甫三載。以勤勞卒於官。囊篋蕭然。無以爲殮。祀名宦。

王齊字元修。新蔡舉人。宋內翰禹偁之裔。嘉靖八年任雄縣教諭。才高學博。工詩文。士之陶鎔多賴之。雄無縣志。齊乃託始。名曰雄乘。即學宮旁隙地建鏡堂。課暇以文酒會諸生。因自號鏡堂。鏡堂嘉會。爲本境八景之一。祀名宦。

謝九儀字邱進士。嘉靖間知雄縣。淵厚端嚴。廉能勤慎。興學校。崇節義。裁冗費。懲奸貪。勵精圖治。百廢俱新。三月而政成。吏畏民懷。甫七月調德清。士民借寇不可得也。官至兵部左侍郎。祀名宦。

王子麒字仲郊。汝南舉人。嘉靖間以山東掖縣教諭陞雄縣知縣。持身端謹。處事公平。開新河。通民利。陞忻州知州。

徐尙文固原州監生。知雄縣。剛毅明敏。修北城及城樓雉堞。一律完固。

張堯弼代州舉人。知雄縣。正大公平。廉謹勤能。均派地糧。輕重恰當。民心悅服。姜朝周洛南貢生。任雄縣教諭。正直不阿。財利澹如。嘗出膳銀恤貢士。風化用振。後以老乞歸。

胡政字仁甫。松滋舉人。知雄縣。老成莊重。沈毅廉能。擒巨寇。以靖民生。修城堞。以壯國勢。拯饑恤苦。凶歲得安。

范元愷號東泉。雲南蒙化舉人。由教諭陞雄縣令。多惠政。祀名宦。修學宮。鑄忠孝節義字於儒學儀門。書法勁健。至今尙存。

孫繼先孟縣進士。知雄縣。廉靜寡慾。明決有爲。先是官吏逮事至縣者。恣索無忌。繼先裁以法。吏民帖服。至丈民田。定則壤。不苛不弛。人尤服其公平。

何夢夔景陵貢士。任雄縣教諭。沈毅博雅。經明行修。諸生成賴其啓迪。以外艱歸。士人思之。

李方生棗強舉人。萬曆十七年任雄縣教諭。禔躬敏慎。課士精勤。擴學宮。置祭器。賑貧生。助婚喪。雖垂橐不惜。祀名宦。

袁寬字念菽。四川漢州人。十六年任雄縣令。惠政甚多。在任五年。陞蒙化同知。民伏闕請留不得。乃繪德政圖送之。郭光祿爲之序。

成己字靜山。鄒平舉人。二十年知雄縣。剛毅嚴明。案無留牘。懲干證以息訟。斥繼母以教慈。陞固原知州。

韓九德交城貢士。二十七年任雄縣教諭。清釐學田。以供貧士。諸生立學田碑以紀其事。

閻應鍾武定舉人。二十九年宰雄縣。下車日荒旱盜起。民爭訴之。緝捕勸化。盜息民安。

劉羽國河南唐縣進士。萬歷間任雄縣令。舊日西城自官溝至觀音堂中斷一里許。無民舍。羽國營屋立市。街始相連。民樂居之。其名鴻雁以此。

林雨潤字浴蒼。鎮海衛進士。萬歷三十九年知雄縣。越明年春大旱。發倉平糶。民甚賴之。擢兵科給事中。

王則古字具茨。禹州進士。萬歷四十一年知雄縣。剛明廉斷。興利除弊。愛民造士。歲六月不雨。民饑盜起。賑濟彈壓。條理井然。

王納諫字青蒲。肥城進士。萬歷四十四年知雄縣。精詳敏練。緩征清訟。百廢俱舉。

汪應蛟婺源人。萬歷丙申爲易州兵備道。按部至雄。謁先師廟。見廟前地湫隘。及捐金購廟前民房以廓之。取其材木。於東南隅建奎閣。復置名宦鄉賢二祠。天啓中開府中山。雄又公所屬邑。時歲饑。公奏貸軍儲五千石賑之。卽以平糶之贏助財用。以就哺之衆。供徒庸。建室若干楹。於先師廟之良方。爲諸生肄業所。卽今學宮也。卒祀雄縣名宦。

任明臣青縣舉人。天啓二年任雄縣教諭。清廉剛亮。真稱師表。新生贊金。盡却不受。忽以疾逝。闔庠爲之變服盡哀。

黃宗昌字長倩。卽墨進士。天啓二年知雄縣。負才有守。嚴於聽斷。甯殺不辜。致大獄多鞠於雄。發奸擄伏。上下皆敬憚之。

許台儔字穉觀。祁縣舉人。崇禎元年知雄縣。老成練達。初以征錢便民被揭。衆

士民叩關。寃白得留。己巳之變。風鶴不驚。持政廉平。親賢愛衆。修城建署。創興獨多。

傅作衡。大興舉人。崇禎十年任雄縣教諭。談經課藝。雅意作人。值亂登陴。率士獨當一面。

張秉禮。舉人。令雄縣。崇禎十一年從縣人馬維城議。建西洋銳角敵臺於城之乾良二隅。是年守城獲效。

曹良直。進士。崇禎十三年任雄縣令。嚴禁吏胥侵漁中飽之弊。凡利於民之事。毅然爲之。十四年用馬維城議。補建八臺。連前一二臺。俱以甄灰固整。每臺建將廳一間。火藥房一間。其甄灰俱令認墾荒地者計畝輸將。隨給印單。俾爲永業。人民使之。公私營濟。城守堅固。敵不敢犯。暇則論文課士。民賴以安。

國朝

塗應旂。鐵嶺歲貢。順治二年任雄縣丞。大有才幹。至隨滿洲圈地。幹旋之力頗多。

戚崇進。字仲升。威海衛拔貢。康熙四年知雄縣。下車詢民隱。除積弊。催科不嚴。苛訟獄無旬牒。去之日。百姓勒碑曰。天下清廉第一。

薰爾猷。字式固。洛陽副榜。康熙六年任雄縣丞。秉躬端謹。能以道義自持。佐理咸宜。署本縣篆。請免水衝地糧。士民感之。

姚文燮。號羹湖。桐城進士。康熙八年補雄縣知縣。雄水鄉衝驛。莅任值水災之後。人民流移。城郭傾圮。文燮撫綏招徠。薄徵革羨。除雜派。均徭役。禁婦女輕生。以清爭訟之積弊。輕刑省獄。賑饑施棺。弭盜擒賊。招流民復業。予以荒地認墾。歸者接踵。又徧築隄岸。捐資修城建樓。各渡修理橋梁。詳革水荒地糧。及鹽額。積困頽蘇。駕馭滿丁。盡皆悅服。修葺學宮。集士訓課詩文。雄志殘缺。重加纂輯。而梨棗之費。則捐已棗。清操刻苦。政治稱最。祀名宦。

袁公衍。字存儒。四川南江舉人。康熙十年任雄縣知縣。持己一塵不染。爲政寬嚴相濟。處衝繁之地。而游刃有餘。絕去火耗。勸民息訟。朔望進諸生講藝。期年循績卓著。

南宮第字壽山。密雲舉人。康熙九年任雄縣教諭。爽剴公直。詩文雅贍。爲士楷
模。課藝品題。文風大振。祀名宦。

甘汝來。江西進士。康熙間知雄縣。罷民間雜派銀。實奸吏於法。歷官至吏部尚
書。

劉念拔。乾隆四十九年知雄縣。建義學。新文廟。百廢修舉。又工書。凡城關各寺
宇。多有匾額楹聯。書法秀勁。人爭寶之。

王榕吉。字蔭棠。山東進士。咸豐初年補雄縣知縣。廉明寬厚。好士愛民。其增前
任某公聯云。賴有兄規模。六載勉爲民父母。不留人怨罵。一官可對我兒孫。素
志可以見矣。任事甫數月。調繁天津。士民號泣遮留不得。置靴而去。後官至大
理寺正卿。

蔣大鏞。字洪聲。進士。咸豐末年補雄縣知縣。政治廉平。公暇則進諸生講論文
藝。親爲斧削。一時成就甚衆。官至順天府府尹。

凌松林。字曉渠。河南西華進士。咸豐五年知雄縣。縣當孔道。軍興以來。兵差絡

繹。車馬悉自僱。不擾民。新城縣青陵隄決。縣屬被淹。捐廉堵築。天津築礮臺。
邑奉派採辦樹株二千餘。皆自行籌運。又建義塾。恤災黎。息爭訟。戢盜賊。在任
七年。家戶祝之。祀名宦。

張儉。玉山縣舉人。同治年間任雄縣教諭。品學俱優。勤於考課。以勞卒於官。著
有四書講義。

葉伯英。安徽合肥人。同治十一年分巡清河道。雄邑爲九河尾閘。多水患。伯英
在雄。疏濬大清河。修復蘆僧河。開挖趙王河。五六年間。各河既通。水患稍息。光
緒三年。復捐金三百。爲雄文書院諸生膏火。並籌捐富紳金。共一千五百兩。發
商生息。闔境士子。置長生祿位於書院。尸祝之。後陞陝西布政使。

趙映辰。字星府。瀋陽進士。光緒十年署雄縣知縣。勤恤民隱。嚴禁吏胥舞文索
賄之弊。民有訴訟者。必問有無吏胥索賄情事。有則從重科罰。甚至斥革。一時
弊絕風清。四境戴德。時縣署傾圮。縣官多借住書院。以至士子疎於課試。映辰
移船局公款。衙署一新。延邑舉人周監易主講書院。以課士。士子至今思之。